

Omesodel A Beluu Er Belau

A cherengelel a beluu er Belau a omuchel ra diluches ra beluu e ra Ngcheangel el daibechebech el me ra Ochallechutem e dirrek el daibechebech el mo ra Ngeaur el ngara dimes. Chelechang el sils eng mia mo uldimukl er ngii a Sungesol ma Tochohei el mekerei el beluu el kmal nga ra dimes-ngebard me ng mocha ingsei Belau, e ng di tia el chelecheduch a di omeketaki er sei el kmal mle Belau ra rechudel.

A domuchel ra diluches e ng ngarnyii a Ngcheangel el iungs el cheroid a delongelel ngii ma Ochallechutem er Belau. A Ochallechutem er Belau a cherengelel sei el kot el klou el iungs el rokir el domekedong er ngii er chelechang el sils el kmo ng Babeldaob. A beluu el ngar sei el kot el mo bedul a diluches a Ollei el beluu ra Ngerchelung, ea ngara mo bedul a dimes a Irrai. A nga ra mo bedul a dimes e kauliochel ra daob ngii ma Irrai a beluu e ra Oreor, ea ikang a bekord el telboes a delongelel el beluu. A Oreor a ileaki el beluu el uldimukl ra chelebecheb el daibechebech el bedul a dimes el mo kauliochel ngii ma Beliliou. A Beliliou a dirrek el ileaki el iungs el nga ra mo bedul a dimes er Oreor, e kauliochel ngii ma beluu e ra Ngeaur ra daob ra Mekaeb.

A Belau el ngaki a dimlak el sal el ulterekoki el kmo ng ngklei a cheldellel a ikei el beluu er Belau el rokui, e le ngaramong ea re ngara Beliliou ma Ngeaur a le danges el me ra Oreor ma Ochallechutem e te kmo "a kimo er Belau ma lechub e ng Babeldaob." Ar ngara Ngcheangel a le omekali el mo bedul Ochallechutem ma Oreor e te dirrek el ou tekoi ra tekoi el kmo, "a kimo er Belau ma lechub e ng louldaob."

Ma doltiraki a uldelid el chelecheduch ra ngaramong el mei, e ke de mo metik el kmo a rechad ra ngaramong a dirrek el ulemngaki er tia el Ochallechutem el dedul kmo Babeldaob er chelecha el sils el kmo ng Belau.

A kuk tekoi el Babeldaob ma louldaob el mle olkael e ra Bab ma Iou el daob al dul kmo ng ngar

sei el otiochel ra Ngardmau ra mo bedul a dimes ra Keiukl el mo tuobed ra otiochel ra dimes er Ngiwal ma Melekokk ra Desbedall. Tia el uaisei el tekoi a dirrek el meues ra habilengel a Professor Augustine Krämer, e ng di ngarnyii el klemedengei ra rechad er Belau a kmo, a omingel a Bab ma louldaob a ngara kekerei el iungs el Ngemolei a ngklel el ngara medal a Ngeremlengui e ra Keiukl e ngarisei e me tuobed ra Desbedall el me ra Ngerutoi el kekerei el iungs el ngara medal a Ngeruiki.

A mo bedul a diluches er tia el olkael ra Babeldaob, ea mo bedul a dimes a louldaob. A tekoi el Keiukl ma Desbedall a mlengai el uakakid a belkul:

1. Desbedall a siseball ma lechub eng sbadel
2. Keiukl a kingall ma lechub eng kiung

A Desbedall a tekoi el ua el kirel a ngelong ra blai ea Keiukl a tekoi el kirel a cheldong ma rebil a blai. A oumesingd el beches el me tnuu ra Belau el tekoi a me tnuu ra Desbedall e me el mo kiung ra Keiukl. Meng uaisei ea omingel a beluu ra Desbedall ma Keiukl ma belual a mila mochoit ra Rechudel Volume 1.

Beldektei A Rengedel Belau Ma Rubekul Belau

A cherengelel a beluu er Belau a ua sei el mila mesaod ra Chapter 1, engdi beldektei a belual Belau a erung el bedengel a telatael, el belual a Chuab ma klengelakel ra Milad.

Me sei el domades er Belau el oak a belual a Chuab eng ua ika el ngariou. A ikaia mechut el renged:

1. Ngerusar
2. Ngerchol
3. Ngersuul
4. Ngermid
5. Ngeruiki
6. Mengelfang
7. UHmang

Ea kuk do oltraki ra klengelakel ra Milad eng:

1. Ngeremlengui